

謹按志宦不曰蹟而曰績蹟者何事也績者何功也官
無論文武內外大小人無論科甲吏胥捐納各有其職
皆各有其事而未必有其功也誠能循分供職即能因
事見功蹟也而績矣我高邑三十年前所志若朱太傅
陳司農諸賢實足與古名臣相媲美今雖芳蹤莫繼而
卓有循聲無忝厥職者是宦績也共得二十七人邑令
高以本志

陳象涓字東望號遇亭米嶺廟前人乾隆壬午舉人已丑
進士授湖北利川令在任五年興學校考課藝文學之
士彬彬稱盛積年陋規一概剔除審斷虛公民無冤獄
歡聲載道既解任士庶如失慈父母遮道祖餞作歌以
表其德刻主祀之

吳棐龍字輔臣號補堂龍山人由直隸宣化府經歷陞任
陝西神木靖邊臨潼等縣令在靖邊時移稅局於鎮靜
堡商民稱便金川用兵臨潼羽檄飛馳軍務絡繹車馬
供億向係各里長分辦改令設廠城隅輪值徵發事舉
而不擾大吏卓薦擢寧羗牧乾隆丁酉以軍功授鄜州
刺史崇節儉興教化建雕陰書院以馬差草料爲民累

籌畫變通歸於妥善事詳鄙人張睿朝記中癸卯陞江
南廬州守甲辰恭遇

聖駕南巡督辦水陸民夫

召見三次

溫諭褒嘉恩賞貂皮大緞大小荷包適江北亢旱決滯獄發
倉廩旱不成災丙午發往湖北署荆宜施道安襄鄖道
補安陸守境失餉鞫被議解任緝獲開復原官致仕八
載卒年七十

朱詔爵字位伍號筠軒坡山人文端太傅之孫必坦之子
世襲騎都尉任廣東和平營都司護理增城營叅將恩
威並行時因饑爭糴成毆捨案詔爵以饑民亂民分析

上請事得釋民戴之如慈父母治兵嚴而不酷賞罰至
公及陞浙閩楓嶺營遊擊兵民悅服九載乞養歸焚香
跪送者如堵墻榮矣

朱國珠字蔚林號鶴山詔爵長子以世襲任浙江金華協
標右營分防永康汛都司時義烏匪類潛謀不法邑民
拾其旗書等稟報琛密帶兵丁捕得置之法不事張皇
不使支蔓陞廣東撫標右營遊擊中途聞計回原任有
兵丁無力塋父將鬻妻哀痛不忍別琛偵知其故給予
銀兩以賞其孝俾事克舉服闋陞貴州提標遊擊赴都

引

見卒於京

吳化敏字功懋號有齋龍山人初任河南溫縣尉繼任湖南衡山尉三任陝西洵陽尉所至長官藉其賢能溫濱大河與鞏民爭灘地觀察親勘敏爲陳歷年形勢地歸溫邑紳張生馨著有去思碑文在衡山爲其宰散賑遍及而無冒濫林太史學易序其事以頌之嘉慶元年教匪入興安各縣戒嚴敏請於令預渡數千人北岸安置多所全活以病乞休年臻大耋

涂家傑字謙萬號益齋楓林人以名孝廉授南城縣教諭甫下車課試生童拔章學濂冠軍濂家貧飲食之教誨之數年入泮鄉薦邑人稱其明而頌其德繼任分宜縣教諭訓士盡職後推選直隸定州州同地爲徭役所苦

減差薄歛民戴之如父母在任三年而歿邑人歌誰嗣焉時濂令宛平聞之號泣因得買舟歸櫬并爲請

誥封二代

吳吉士字勤相號藹亭龍山人由乾隆癸酉優貢授袁州府學司訓甄拔單寒誘掖多士在袁二十餘載文風爲之一振推陞義寧州學正一如袁時課士之暇與萬和圃日相唱和彭雲楣戴篋圃皆稱之爲畏友也年八十猶能燈下作蠅頭楷所著有易山房吳勸相稿

熊中文字坤五號在亭南城仁濟坊人由乾隆丁酉拔貢任南康府安義教諭俸滿保舉選浙江金華令庚申夏大雨彌旬江水泛漲城不沒者三版文自取衣冠投水

中雨乃止然高下田原已成巨浸矣先是南康大水合郡僚屬俱往勘災中文所至分別經畫獨得其詳大吏奇其才遂陳薦績至是益奮請於上官奉

旨蠲賑悉心力籌哀鴻盡起嘉獎賢勞調蘭谿劇邑金華人攀留不得請蘭距金數十里循聲懋績邑中人已熟聞之咸相慶幸未數月解餉赴滇旋罷任兩邑士民以賢父母不忍別爭相餞送投詩盈篋彙爲一冊題曰金蘭棠蔭

熊中簡字臨可號竹間南城仁濟坊人由太學生應乾隆丁酉順天鄉試薦卷取四庫館膳錄議叙授福建順昌縣佐地多担匪密法祛除一時盡靖商民並載其德

署松溪大田等令循聲懋績父老咸樂道之方卓異入薦疾作告歸歿年四十向使充其英敏之才以終其用知必有秩加顯而績彌茂者惜天不假年然十載宦遊家徒四壁良可風也

吳錦元字輯五號梅崖龍山人乾隆癸未進士任陝西米脂令性嚴靜不苟言笑吏胥畏之下車觀風首拔邑士高鎮是年即膺鄉薦咸誦知人其地風氣剛勁化以寬厚而俗革與士談詩書與農勸耕稼有笑其迂者弗恤也清慎震一時上游亦雅重焉在任五年以病乞休朱振聲字集成號曉村坡山人文端太傅之元孫嘉慶四年

欽賜舉人一體會試充

實錄館校對官議叙授廣東吳川令性耿介御民以寬數載民無冤獄地瀕海疆有洋匪出沒擾害爰團練鄉勇隄防獲賊者給重賞民賴以安調陽春甫一載以勞瘁卒於官

朱景華字芝庭號春園文端太傅之元孫嘉慶四年與堂兄振聲

欽賜舉人一體會試同充

實錄館校對官議叙授山東日照令生平束身修行誦讀外毫不干與尤工書法居官廉明上游極器重之要案多所委任未幾以心疾卒於官邑民如失慈父母焉

吳瑩字潤之龍山人遵例報捐棟發四川歷署武隆百丈等司壬午題授石砭府照磨所至頗著賢勞丁外艱服闋旋補邛州吏目時大小金川軍書旁午邛當衝途差事絡繹瑩奉州牧楊委辦儲胥晝夜勤勞肆應悉洽楊以其能白於大吏請儘先陞用未數月卒於官楊深憾折其一股率屬吏等爲文祭之

吳鍾岳字挹五號秀峯龍山人乾隆庚子舉於鄉乙卯大挑一等籤發山東抵省委辦軍需加隨帶一級歷署陵縣壽張掖縣諸煩劇所至有聲繼署曲阜喜曰一行作吏得近聖人之居是學者之大幸也嘉慶庚申補館陶令甫下車值大雨衛河漲發堤岸決口數十處募夫疏

築奏免錢漕辦理賑務各憲親勘稱善記大功一次次年水平蝗起竭力撲捕不爲災合邑進生佛之頌學宮傾圮捐廉修葺聽訟平允無留牘蒞館陶十載撫恤民隱嘉惠士林獄鮮冤繫戶化澆頑庚午因公被議去之日攀轅祖餞者數十里不絕

吳居恭字紹祖號禮齋龍山人乾隆丁亥任四川葫蘆溪鹽場大使奉解軍需赴緬甸大營刻期蒞事制帥署能員第一留辦軍務回蜀後任三臺縣事以憂歸甲午分發福建補延平府經歷旋署南平令所在有聲丙午因公被議後任直隸保定主簿淒風冷雨効力河工知恭者以爲有郭若思之勤能范萊蕪之清介焉以老病卒

於官

王茂煥字文思號樸齋官坊人乾隆癸酉舉人初爲峽江學博造士有方儒林宗仰汪大宗師以教職出色人員宜膺民社保薦因途中患病仍歸峽庚子丁母艱峽之士有追隨千里者服闋選四川蒼溪令廉靜寡欲一以愛民養士爲心因隣縣有冒充武員者曾經其邑失察落職邑紳欲請復煥不許遂歸足不入公門以裁成後學爲事乾隆癸丑纂修邑乘其手筆居多年八十卒傅作求字世芳號石蘭十一都山畬人戊午領鄉薦辛酉成進士授內閣中書入直無車馬而知交困乏盡力扶助雖典質弗恤邑有會館在京歲久就圯捐貲倡修卒

復舊觀嘉慶壬戌充

實錄館校對官丙寅修

大清一統志開方畧館分校浙江省志凡有累代同居者條錄寄示子弟以修身齊家是儒者真實事業骨肉情深斯可推恩無間也丁卯北闈掌受卷所撒棘奔喪守制嚴督課藝雖頑鈍不令廢學既小祥親營窀穸凡先塋之傾圮者必修整之不分諉親屬服闋入都檢校

文淵閣陞主政當事器其名欲招致之不可得以疾卒於京

朱輔臣字佐卿號鑑湖坡山人遵例報捐分發貴州候補吏目借補貴陽府司獄後補麻哈州吏目乾隆乙卯調

辦軍需適匪黨吳半山暨小竹山磨漫山賊匪橫行黔屬商民被掠者甚夥輔臣多方購線帶鄉勇勦捕諸匪盡靖屢邀軍功議叙由思州府經歷游陞銅仁令卓有政聲至今猶頌其功德

吳奕輝字載德號曉峯南城石橋人由廩_八領乾隆壬子順天鄉薦補信豐學博甫到任即倡修

聖廟丕振學校攝桃江書院掌教聚生徒講貫曉喻大義諸生服其教有蘇湖模範及教思無窮匾額信豐素強悍四姓以世隙械鬪釀巨案委員屢諭不聽先中丞公親詣贛郡欲兵之不忍不教而誅諭奕輝前往開導怨乃釋救全無算舊屯田二萬餘畝嘗苦各佃隱漏官多

賠累每年計三千餘金查公觀察以事關 奏案專檄
奕輝履畝清勘悉符原額由是屢膺保薦力辭不就年
七十二卒於官諸生涕泣送者數百人所著有勸學篇
敦行錄尚有枕江課餘文集小蓬萊詩集待梓

吳居闕字勳懋號晴舟龍山人乾隆壬子癸丑聯捷進士
是時鄉會兩榜無如闕年少者嘉慶十年授安徽含山
令甫下車即代和州牧驗訊武舉某毆斃乞丐一案發
奸摘伏人頌神明留心民隱事無鉅細必親自體察胥
吏無從舞弊嘗以薄俗圖賴婦女輕生爲憾痛懲之棍
徒王元仲有族姪小月鬻於蕪湖某氏年餘遁歸元仲
詐控毀屍滅跡經太平守訊無實情元仲竟置小月於

死而堅執不屈事上僅以刁控擬杖越一年矣元仲因
他事牽証閱憶前事從容鞠問得謀殺情置之法含邑
連年苦旱蔬食步禱甘霖立沛十六年西北鄉荒歎募
穀周濟民藉以安丁卯癸酉兩科分校江南鄉試所取
皆名下士在任十載政簡刑清民初憚之繼則親愛如
慈父母公餘靜坐左圖右史及晉唐法帖靡不研究歷
寒暑無間書法名重一時惜年僅強仕未竟其用

彭元定字衡階號靜堂北城碧落山人浙江按察司經歷
署江山令借補歸安分縣有爭水圳通塞案構訟二十
餘載至則爲之設板閘晚開早閉農桑俱利士庶咸感
勒碑以誌其績乾隆庚子恭遇

聖駕南巡委辦桐鄉縣正站差務籌備謹敬時刻不差
恩賞綢緞荷包同寅有濫封米舟者民情鼎沸周旋鎮撫始
克安貼上游稱善乞養歸里足不入公門年登八十有
六四世一堂

吳燦章字慶雲號樂齋黃溪人以太學生授柳州府經歷
庶能有聲乾隆乙未委署上林令邑有嫌壻貧而離婚
者訟數年未結抵任時袖金賂之曰若與壻女偕來吾
爲汝斷及到案責曰人所重者倫常夫婦爲倫常之首
奈何以貧故易盟乎且汝壻聰明嗜學非終貧者遂以
所賂金付其壻併諭割產爲奩資當堂行交拜禮後壻
舉孝廉夫婦繪像祀之又驗一溺屍見傷痕知非自淹

密訪之爲謀財致命緝兇置之法致仕家居絕不一謁
公庭卒年七十有一大理寺卿張鵬展其宰上林時所
拔案首也有哭吳夫子詩二十韻並爲之傳

徐浩字東澗號柳齋城南仁濟坊人幼讀書棄舉業走京
師充方畧館供事親王某聘教諸世子讀訓課外絕無
所干選廣東海康縣清道司巡檢海康地近海洋賊匪
充斥浩領弓兵加意巡緝商民賴以安堵調署府經歷
值海康縣試邑宰公出郡守知浩學問優長委令代試
學使額取十二名即浩所取二十名前列者也粵人士
咸嘆服浩精工書法更善擘窠大字刊有邇易堂楷法
墨本書家奉爲楷模爲文力追韓歐不屑屑於章句其

姪葯生庶常深得教益人祇知其工書法而不知其積學深醇迥非尋常佐貳所能及也

陳聞炳字耀遠號春亭赤土人 例授州同請

封二代復改授縣丞籤掣廣東新寧大澳分縣時陸豐叛匪蜂起請兵勦捕擒獲首夥千餘名奉

旨以知縣陞用旋補新寧爲上憲所倚重因緝捕土匪出力制府蔣保奏奉

旨遇有繁缺知縣奏請調補旋授惠來調繁高要甫下車即將歷年積案斷結念縣屬端州附郭爲嶺南衝要路久不修一力捐廉完整往來稱便他如設倉廩建育嬰堂義學難以枚舉邑紳刊有實政碑以記其事己卯

覃恩

勅授文林郎丁母艱回籍服闋因高要任內拏獲盜匪六百餘名送部引

見奉

旨仍發廣東以知州陞用委赴揭陽查辦匪犯三王五虎等置之法粵民稱快委署揭陽數月審辦積案數百卷以勞瘁卒於官

丁德嘉字二宜號惕齋別號海門火石丁坊人乾隆辛卯副車選授直隸易州州判調任遵化州判署良鄉遷雄縣令公正廉明臨事果斷卓有政聲尋以外艱歸服闋棟發湖北時值襄陽用兵軍前効力頗著勤勞委署沔

陽州牧辦理水災核實散賑戶口丁男無不歡飽沔西南之新堤苦水患舊堤亦叠遭衝决因相其機宜捐廉補築得免泛溢至今稱丁公堤沔屬民多健訟累延不結到任清理塵牘懲勸交施不數月俗頓革三載士民愛戴去之日行李蕭然合州繡兩袖清風之幃以覆其輿補安陸歷署江夏雲夢治績彌著其大端不外重士愛民寓精明於渾厚之中自顏其堂曰留餘地步年六十九卒於安共立勤政愛民匾額於署誌不忘也

徐乘時字應有號雨堂城南仁濟坊人早歲失怙惟寡母是依家極貧機燈照讀餬口無資為人抄寫經史每錄一篇即專心研究乾隆壬午以庠生領鄉薦

大挑二等補萍鄉教諭專心訓課遊其門者如在春風化雨中宮保劉金門髫齡來謁即以重器目之越十餘年陞贛州府教授其課士亦如在萍時甲寅截取知縣不就任教職三十餘年無一處分案以太常寺典簿陞用未赴嘉慶壬戌以老乞休贛士攀留者數百餘人餞詩盈篋贈以多士楷模匾額自學署至河干祖帳不下百餘席觀察郡守暨寅僚等各贈以詩年八十有四無疾而卒

傅大川字岨瞻號涵齋珠湖人任安福廣文安邑文士向與廬陵吉泰並盛後稍衰至任却贅嚴課誘勸倍篤文風丕振會歲饑邑宰尹奉上檄賑濟請襄其事慨然身

任籌畫周詳奸胥猾吏杜絕侵漁民沾實惠上憲庶其
能將拜疏薦外計適至服闋補廣信府學博奉檄查七
屬禁書事舉而不擾所至靡不賢之緣是勞勩得疾致
仕歸

文苑

唐

任濤邑治人性慧超羣詩名早著時常侍李隲觀察江西
聞其詩有露搏沙鶴起人卧釣船流之句遂特免其役
鄉民有沿例訟之者隲大書判云江西界內如有詩似
濤者並與免役無敢應者咸通中登進士與許棠張喬
俞賓之劇燕吳罕張蠙周繇鄭谷李棲遠温憲共稱十
哲皆李建州主試所得也

李思元字文成好學擅文行誼高潔年十六舉進士為文
林郎時滕王為豫章守待以師友之禮名重一時

沈彬字子美天才狂逸好神仙術少孤西遊以三舉為約

嘗夢着彩衣貼月而飛推者謂其身不入月終不及第
初舉至長安作夢仙詩云玉殿大開從容入金桃爛熟
沒人偷鳳驚寶扇頻翻翅龍悞金鞭忽轉頭再舉作憶
仙詩云白榆風占九天秋王母朝回宴玉樓日月漸長
雙鳳睡桑田欲變六鰲愁雲翻簫管相隨去星觸旌幢
各自流詩酒近來狂不得騎龍却憶上清遊三舉贈劉
象詩云曾憶大中天子舉四朝風月鬢蕭疎不隨世祖
重攜劍知為文皇再讀書十載戰塵消舊業滿城風雨
壞貧居一枝何事于君惜仙桂年年幸有餘劉象是年
及第彬乾符中南遊湖湘嶺表過吳知先主欲伐楊氏
獻山水圖詩云須知手筆安排定不怕山河整頓難覽
而喜之官至吏部侍郎致仕退居高安臨終指墓處以
示家人穴之石磴臺上有漆燈一盞壙頭有銅碑鐫篆
文云佳城今已開雖開不葬埋漆燈猶未滅留待沈彬
來

按沈彬一人也稽神錄以為吳興人一統志載彬墓
在京口丹陽縣豫章則以為宜春人江西新舊志袁
州瑞州重複互載今據南唐書沈彬洪州高安人唐
末浪跡湖湘隱雲陽山好神仙善賦詩烈祖輔吳表
秘書郎與元宗遊俄懇還以吏部郎致仕元宗遷南
都彬年八十餘來見厚賜粟帛以其子為秘書省正
字先歲彬常策杖郊原手植一樹識之語其子曰吾

當藏骨于此及卒伐樹掘地至丈餘得一石槨製作
精麗光潔可鑑蓋上有篆云開成二年壽槨舉棺就
之廣袤中度子麟性至孝廬墓感慈烏來巢之異且
今墓在龍城宣政鄉義泉里其為高安無疑矣舊志
訛龍城為城南

宋

魏京天禧中進士潛心理學措行端方而又博古能文鄉
里以魏夫子稱之名其所居曰儒榮坊

劉平伯漢建城侯之裔高蹈好文名士推之二蘇兄弟每
過訪焉並有賡詠子瞻寫墨竹以贈今猶藏其家

唐允功字汝賢姿穎好學于經史百家無不通貫時人號

為書櫛丞相趙鼎嘗大書潛心居士四字贈之所著有

飴經倦錄行于世

按允功人物志作允恭

陳世昌字正卿赤土人淹貫羣書多聞強記兩中博學宏
詞科詞復州錄事叅軍以直慙不容于時遂飄然初服
自號大田老農所著有漢韻一千六百字及老農集並
贈灸于時

劉能字貴才號松壑實齋次子年十一父命從晦菴于武
夷精舍晦菴與語奇之授以小學題詞後數日問之應
對如流遂以學庸章句論孟集註程氏遺書數十卷授
之居二年日夕講貫微詞奧旨罔不精究後以母疾告
歸晦菴命取帑書四十八字以戒之曰脫去凡近以游

高明勿為嬰兒之態而有大人之志勿為終身之謀而有天下之慮勿求人知而求天知勿求同俗而求同理能拜受之而歸卒乃闡學筠陽益明師訓元定之貶幾為禍階父作子述嗚呼賢矣

李師愈字好古博學多聞負笈從劉子澄講學于匡廬山中朱文公高弟李埜嘗訪師愈有詩稱之宋乾道間領鄉薦漕使芮華舉師愈應制科未及赴而卒人惜之胡仲霖字成甫仲雲之弟嘗從事蔡適盡得朱晦菴之學父子兄弟自相師友學問淵源後與其子希是俱隱遂以終身

胡希是字則翁仲霖之子八歲動循規矩年十五博通經史從諸兄游京師一時名公皆折輩行與之友伯父仲雲嘗遣謁江古心盡得其為文法下筆有西漢風宋亡家居著述夜分不寐端方嚴篤一介不苟取予所著有洪範考訂大學稽疑太極圖說史傳集論及于山集行世

朱昫字景暘社山人中理宗朝神童科官大理評事號荷山先生有策及文集傳世理宗寵賜端溪硯詩曰紫袍雲藹藹金帶露重重朕有端溪硯賜與朱神童

趙希普字宋卿天資警敏卓有詩名兩請江西漕舉以宗室恩授廬陵主簿再調南城丞改秩知奉新縣陞臨江倅卒于官所至多惠政有西庄斐稿藏于家

武允蹈字德由筠北高家巷人自號練湖居士品行端方
嘖笑不苟兩貢于鄉資敏識卓刻意吟咏每一聯出輒
膾炙人口所著練湖集行于世

塗近正城北縣下人敦倫篤行博學能文而深于性理所
著有明倫集與朱文公小學相為表裏士林範之

元

楊浚字子源博洽書傳精練吏事至元間辟為掾吏枉直
一任理法所全活人甚多壯年即投筆杜門惟養親課
子為樂溪船嘯月山屐訪春趙子昂書子源二字繫之
以詩云子源賢功曹四十已投筆杜門勤畊桑教子習
儒業世方貪誘縵斯人可圭璧吾非私吾友乃是敬其

德何時一尊酒相與保空寂

伍良臣字雲從元駙馬都尉興甫之子塵視富貴致力經
籍為詩文暢達清潤壯遊京師道不諧于俗後辟為臨
江經歷八十日即棄去時元社將屋識者謂其鳳翔千
仞希蹤古之明哲所著有中流一壺集行世

周德清號挺齋暇堂人工樂府精通音律所著有中原音
韻行于世虞伯生序之曰隨時體制不失法度羅士信
稱其詞曰毋使如陽春白雪徒為寡和蔡虛齋先生並
有序表之

明

朱溟字誠則社山人學有淵源行重鄉邦洪武初以薦辟

任本府訓導豐城同宗一齋學士監察筠陽為之序曰
每應接餘暇焚香讀易探姬孔之奧旨繹朱程之遺緒
意有所會欣然自得不知老之將至讀一齋文可想見
其人真儒者也有詩文語錄傳世崇祀鄉賢

胡璉字商用博通經史議論英發尤精邃于易性傲岸不
曲合親朋有過必曳杖直告其人引咎則怡然曰友道
貴直非訐也父死括蒼兵興道梗璉艱險萬狀負骨歸
葬人以孝稱之明兵至江西天完將劉敬欲退守新昌
璉說曰今真主已出不降何待且瑞不可守况新昌乎
宜亟為一郡生靈計劉素聞璉名求之不得欣然從之
無可遣者璉為奉書詣軍門降民賴以安大將軍欲官

之辭弗受洪武初應通經舉為本府學訓陞句容教諭
致仕杜門觴咏所著有易學會通及諸史百子手筆百
餘卷

羅均友洪武初由辟舉任本府教授以聖賢為宗敦濂洛
之學惟以植綱常淑後進為務捐俸創修明倫堂士論
重之

按白公省志據一齋所撰清溪書院序改為君友

况琛字宗魯永樂甲申進士聞母喪奔歸哀痛幾絕服闋
赴京道經九江聞弟喪遂乞恩踈養終身慕父不欲仕
後除永平授不赴解學士縉有詩贈其行勉強之任永
士僻陋琛設程課藝不數載而文風丕振科名蔚起然

拙于逢時尋歸杜門多著述嘗自製圖書云守賤不移
遂自號馬

孟充字實夫城西人博洽書史為文有理致由舉人授叙
州府學訓導陞福安知縣朝夕吟咏所著有山樓集

徐振字伯起行峻而廉學充而正由舉人歷晉江教諭長
沙教授生徒有貧而攻苦者輒捐俸資給之所成就多
名士祭酒蔡公清出其門

朱廣明字則誠穎悟工詩文由舉人歷山陽增城諭寧海
學正從遊甚眾求文者無虛日著有貽笑集

陳用字廷重由舉人歷遂寧教諭長沙衡州教授質古勤
儉以身教人卒于官子禧字鳳朝天資粹美邃于學言

動恂恂喜怒不形于色士論方之黃叔度

陳益字啟行以六經教授子弟學者稱行素先生所著有

敝帚集 載通志

廖暹字曰佳以春秋中嘉靖戊子鄉試任浙江武康令調

福建詔安令政務寬平尋罷歸嘗從安成鄒東郭先生
講學大有理會因邀至其家令諸子北面受經後暹歸

構西郊書院延致東郭為筠士發明良知之旨邑之名
士皆出暹門晚多著述有丹泉漫稿四書測春秋測希

天務本二錄行于世子性之字道夫亦以春秋中嘉靖
辛酉鄉試弱冠隨父亦從東郭講學崇實敦恬初授陽

信教諭轉浙松陽縣令清操惠政松人頌慕陞雲南路

南知州致仕歸里靜處一室朝夕吟諷未嘗一造郡邑
即親族亦罕見焉

楊鉞號松亭朝天坊人潤之孫十九補邑庠生食餼文行
兩優閉戶課經父子自相砥礪學使徐公郡守許公賜
以冠帶屢舉賓筵直指有理學名儒之額著皇極經世
測聲音律呂考証松亭崇正錄

吳用行字因應南城禮義坊人郡增生少倜儻不屑屑家
人產隱居蓮池之一笠軒著有淡語二卷房伯夢賜嘉
其文誼嘗與伯兄可行奕同邑敖祐作雙髯奕贈之其
詩云延陵有雙士逸興自翩翩已具王佐才所樂在印
園美髯且姝安朋壽更皆賢圍棋二國手在髮兩神仙

碧蓮漾清渚飛虹凌紫烟室有鳴琴韻門無車馬喧試
問蜉蝣者何如松柏年

朱家繩字季直社山人性穎異善讀書苦志殖學補郡諸
生聲名藉甚丁卯詩二房入彀數竒不售將貢先期而
卒著有義山集

劉世元字善長鈞山人為邑諸生賦性剛直秉心孝友下
帷博極羣書為文雄渾落筆立就屢試不遇遂拂衣歸
年未四十生子曰珩纔三歲即朝夕訓誥後子果弱冠
掇科三受綸翰贈屯田司員外郎居常誦司馬溫公之
語以訓清白又曰正直存天性中和養道心吾生平以
此自矢不敢愧屋漏汝宜自勗王言曰齋身豐後信不

誣云

徐裕善號鶴池北里人隆慶恩選由惠安訓陞桐廬諭常德府教授勸學勵士賢聲四溢在桐之日歲大祿力請倉粟以濟窮困不給則捐已俸以助學宮鄰義塚枯骨暴露取而瘞之直指馬君獎其賢年八十一卒

廖承芳字鍾華氣豪邁善談論蚤歲補諸生銳意用世從父宦南北歷覽山川形勝人物風土其學不常門天官歷律風角諸書無不賾探而隱索之既病廢度不果用迺更肆力問學詩倣七子古文宗蘇長公書法摹晉魏皆能擬議變化自成一家大司馬陳公佳左見而嘆服摘其佳聯以配唐人如西風草閣悲長箋明月蘆汀憶

短簑陳王賓客俱文采緬國園亭盡主恩其名句也芳雖病廢其泉石風月之興不少損意之所適籃輿徑造杯觴嘯咏陶然終日其所款接率騷人韻士衲子羽流平生著述有浪遊草淡園合併詩文蕉窻雜錄林泉志餘海天史畧選勝探奇諸集

劉子立字以中號蛟泉西陽人年十五失所怙貧無地安厝日夕悲泣神遂告以葬處善事母吳氏病失明不離左右者十餘年母卒廬墓側兄弟五人皆其完娶仲弟季弟歿卒撫其孤為已子孝友惇睦人無間言尤博洽經史試輒首多士聚徒至百餘人一時縉紳半出其門嘗授學于鄒東郭與鄧元錫傅明應論道後園書社交

相砥礪其教人一以躬行實踐為主有體有用得聖賢正脉筠陽有劉夫子之稱常有劇盜過其門相與戒曰此劉某之家不可犯其德孚于人類如此憫筠俗棄女身育五女為之倡作育女文以勸之感而舉女者不可勝記邑賦偏重仗義與吳會廖寶等極力條陳得改南折筠人德之惜九科不第以歲貢授湖廣安鄉訓導卒于京所著有易經新義孝經註疏二史抄大學衍義板藏于家祀鄉賢

况世美字承之垂髫即以遠大自期賦性耿介絕迹公庭學使者屢旌異之七困棘圍以萬歷乙卯歲薦司訓豐城一以作人為事日與徐匡嶽談正修之學及轉楚大治諭辭曰寒羶非吾志草率了此足矣何間關楚遊為遂拂袖棘郡邑屢請賓筵固辭不赴

陳如綸字元泉萬歷間恩貢就竹山令有善政苦節自持竹人士尸祝之念母在堂致政歸奉母克孝至老不衰林泉二十餘年無飾服無飽肉無結椽以遺子孫時與老宿結社詩壇柏林松竹之間吟咏風月而已著有任學全編等集歷春秋九十

陳汝錡字伯容號真吾萬歷間人少穎異不羣長而骯髀自負好議論天下事作秀才即獻書開府邊公談兵事見海剗峯總憲南臺即上書說其勇退謁選上春官則不肯私謁同鄉部堂人官建陽訓導則表宋失祀死難

呂祉之鄉賢哉當寧宗伯故父翁見溪獨金字牌之名
宦種種不避忌諱以義聲矯絕一世惜居任未久而卒
所著有長短書周史總邑人劉九巖尋而表章之僅得
短書殘板補刻廬陵張太史為之序長書周史總僅得
十之七八屬其孫良多積抄之今俱湮

陳元琛字仍玉陳家湖人劉之曾孫質行端方文學淹博
以貢任南康府訓督學駱日升聘主白鹿洞倡明經術
四方名士景從咸謂江右徵君章潢以後一人遷建昌
教諭從遊講學者益衆有興賢易俗之風陞汀洲府教
授致仕家居讀書疏水自樂郡守陳振揚屢式其廬學
者稱見南先生所著有此行漫筆南遊拙草拂袖餘談

諸詩集後祀鄉賢子廷翰廷輔先後令闕西有政聲

范世芸字陽華長沙舖人幼具至性秀雅異羣兒稍長嗜
讀每至丙夜不休經史纒纒淹貫而動以古人自期司
馬陳邦瞻宗伯教文貞早以問學相友而見解強記每
推讓世芸及二公貴每揚推古今經世之務則就正于
芸芸直諒自如終其身無交利囑子之私士論高之晚
以貢謁選授廣東始興訓造士有蕪湖之風尋解隸生
緒蕭然哦咏不輟芸之才學識雅優著述然不欲以言
論增風波而欲以踐履歸實地故筠士論君子儒者必
首推焉

熊一粹字子賢別號旋川幼端凝讀書有夙慧博通經史

百家與邑中劉蛟泉王槐庭諸名士遊每拈經史一疑
義人人咋舌十七補弟子員為學使巖泉徐公所賞識
屢因塲屋一日喟然嘆曰吾學但取青紫已乎不究性
命終虛一生遂棄舉子業潛心聖學手校宋儒大全諸
書造次跬步必準于道義致孝二尊人居喪哀禮備至
尤友愛諸兄弟舊宅童僕多所推讓念族無會祠典禮
草畧乃捐金建祠酌定饗祀諸儀註為籍又為譜序以
別昭穆常製家訓三條言近而指遠先是一粹三十無
子乃撫兄子茂松為子庭訓嚴切茂松刺滄州迎養署
中勗以甘貧耐苦無免人三語既而思曰滄瘠且衝吾
何可以口腹累孺子且分孺子勤官之心乎趣裝歸囊
無一物恩誥兩次漠然不以為榮老而好學咬齏讀書
每一衣經十年許不敝品其人可居黃憲管寧之次考
功郎鄒維璉為之傳

胡維翰字良輔橫江人少敏慧博洽羣書為諸生試輒冠
多士大為郡伯體乾黃公賞識延入署中與諸子共學
出入謹飭絕不及私事黃益重之舉萬歷丁酉鄉薦出
宰泰寧鄭西二邑所至有惠政然性剛毅不能委蛇隨
時竟拂袖棘里閉門謝客授經于子若孫甘守清貧以
詩文自娛所著有誰思吟西遷諸集

劉顯璣字席珍西陽人自幼讀書過目成誦醞釀諸史百
家靡不淹貫為文清真高古不傍他人墻壁萬歷丙午

補博士弟子員屢試高等壬子戊午兩次薦卷得而復
失毫不介懷愈閉戶窮經招里族工詩賦者朝夕吟咏
以養恬淡之天屏絕外事自是詩賦彌稱小杜生平雅
不存稿只留杜若詩集及課試文稿俱不下百餘首待
刊行世胞弟顯璋補郡庠弟子員凡一切詩古文詞悉
準繩于璣而風艷遜之時羨家學淵源

陳汝俊字仰文十五都大成人弱冠補弟子員五赴棘闈
性至孝年踰六十依依孺慕一日父病劇百藥弗效汝
俊手捧心疏中夜籲天願損己壽以益父冀聞者悽惻
越日父病甦後汝俊以病終宗人哀而誄之曰大家文
字追西漢樂府新聲擬盛唐不第劉蕡滋永嘆藏書讀

罷淚千行著有西歸記黃花百韻四子銘

朱家紀字憲初社山人太僕吾弼子以蔭當得官然不屑
也砥礪學業為時譽髦萬歷丙午試為主司亟賞而卒
裁于額生平敦尚行誼格言正論垂為典則與叔吾楫
交修尊祖敬宗之行雅慕范希文高風惜年僅顏壽逾
二賚志以歿太僕復鄒南舉言吾兒學本聖賢志存
匡濟以天下為己任非虛言也子恒敬天啟甲子舉孝
廉

陳邦儀字開甫荷山人與兄邦屏弟邦瓚俱工舉業有名
庠序邦儀尤篤志自勵族兄大司馬邦瞻亟稱之八入
鄉闈不得志遂肆力于詩歌晚益瀟灑自得有陶絕亮

之風所著有彈劾草舊志遺今考通志補入

劉武孫號清貽郡廩生將貢以母八旬在病自安引退閤
寢侍膳十年足不出戶母死哀毀骨立祭墓一如家禮
晚閉戶力學著有文史提綱經史提綱春秋定衡周易
象解四書質言水緯及佐時旁議山林讜議諸書明季
部較郡邑舉巖藪實行有德之士署郡司理張大烈廉
其文品將上薦武孫以髦辭學使陸錫明賜額表之張
公序其文史提綱二十卷未梓藏于家

舒宏緒字芑孫城北人郡廩生具雋才以詩文名嘗與江
州文用昭南州徐巨源輩結匡山大社于會城巨源推
其七言律香艷可空作者屢舉弗售遂補南雍恣遊吳

越間溧水陳百史婁江吳梅村宜豐黃石公互相友善
卒于金陵客邸主人殮之南州鄒士可在白門為之歸
其樞詩文多散失存者僅十之一

胡偉號一庵石街人攻苦力學以古人自命處約淡如伯
子知其貧欲分潤之辭不受事母甚恭謹惟知養志崇
正已郊鄉試見知馬太史世奇稱其七執言言血性甲
申聞時事之變太史殉難偉傷悼廢書誓老邱壑年躋
八十而卒

朱朝綬字斗如軾之祖品行純潔動以聖賢為法而湛深
經術旁及諸子百家靡不淹貫補弟子員試棘闈得而
復失者再然志彌堅而學彌篤不以時命自諉雖終其

身數竒不遇而其人其文都人士咸宗仰之弟朝縉亦資穎學富名噪一時而享年不永惜哉

范體仁字長卿長沙舖人賦才磊落以博學瞻詞稱屢冠多士崇正己巳選貢授粵西叅軍上治平書切陳時艱留中不報陞長寧知縣以國變未赴家居杜門著述有種書閣集泉閣雅言是烏閒編二十餘卷

梁吉字允迪溪上人幼穎異讀書過目成誦闕閩瀛洛諸子百家之奧靡不研究精微九歲入縣庠十歲食饌廩自是名噪膠庠每遇文宗較試輒取冠羣英生平著作甚富惜皆散佚僅刻有梅花詩百韻行世

陳一鵬字九萬西塘人年十四補弟子員聲譽奕奕試

高等學使陳懋德王維夔賞鑑倍常晚與劔邑羅吳皋太史唱和鼓吹風雅厯諸生五十餘年嗜學弗倦卒之前十日以寢疾輟誦讀謂其子恂曰可書壁以志吾過其攻苦類如此著有西塘集

宋士毅字任卿馬鞍嶺人稟姿穎異過目不忘邑令陳從教拔冠軍丙子領鄉薦激昂任事利弊悉有條理甲申變後自引退幾以蔓引罹禍事釋閉門著書辛卯卒于家

楊懷玉字斯立埠頭人飫于經史言笑不苟設帳南城門下稱肅齋先生著有元亭草并筠陽八景詩

劉丹生字心如曰珩之子甫讀章句師以瞻彼淇澳令對
 即應聲云止於邱隅衆奇之年十二補弟子員試即冠
 軍同輩心折品其才如錦誼如雲不可一世與宗人九
 疑稱二劉崇正壬午以葩經冠多士本房沈應旦以中
 秘期之後有所迫小就匡城教授兼督白鹿洞課士之
 暇徜徉五老九奇間日與同邑鄒篤生黃岡王一翥南
 州謀紹津詩歌唱答起立黃犢山大社并捐貲葺先西
 澗遺址有終老香山之意號犢山居士改都昌諭從遊
 者日衆天不假年士林惜之

徐日曦字子馭仁濟坊人少警敏目數行下試輒前茅與
 同里劉丹生熊坊劉九疑宋士毅王尚卿等合六人共

訂源社咸推曦為社中祭酒以府學廩生領崇正壬午
 鄉薦鼎革後或勸之仕曦謝曰富貴非吾願唯擁戶著
 書暇則涉田園與鄉人話桑麻賭酒差足快耳嘗從百
 丈源和尚談經頗有解悟一日偕衲子煮茗夜話四壁
 闐然忽笙簧過耳一座驚異曦獨神怡漏盡返房闔家
 人亦以所聞告曦曰有以哉吾今全受全歸矣不踰時
 端坐而逝子星奎廩生星璧歲貢能世其業後裔科甲
 稱盛

劉九疑字嶽生一都金沙羅苑人領崇正丙子鄉薦丁丑
 庚辰連上公車不第見明政日非杜門索處築傍蓮書
 院於蓮池之上屏絕應酬著書自得畧載江西通志

申聞闖賊陷京師哀呼號泣如喪考妣投蓮池水以殉
難鄰人見而救之即懷刃欲為自殺計其父涕泣曰爾
舍生取義固其大節但何以安吾二老於是權衡忠孝
兩難之際奔國蓮寺薙髮為僧以首與親以髮與君易
名性孳易字慟子縛草為闖操矢以射又於書院之旁
卜基方丈築為壽藏預勒明遺民劉慟子墓顏曰慟城
著慟城曲二卷丁內艱以守制制字宜從自致之義著
致草一卷丁外艱著後致草一卷其忠孝性成凜然節
義雖在草茅忠君愛國之心惓惓不忘學問淹貫博雅
詩尤奇快一字一句之間經其錘鍊便推陳出新著有
髮聲詩一卷髮牘詩一卷蕙泉詩一卷同患言詩百餘

首燕子詩二十四章誠意章制藝五十五篇手禱微能
一集五經講意一集選義林三集按吳志此傳多摘去
今據聶志補入

鄧應宿字小白庫溪人與兄應韜先後餽郡庠韜由恩貢
官至太守而宿落落自適屢赴棘闈志不干進題詩裁
簡自命烟波主人甲申變後買宅於艮山娶妻子從之
三年不出卒死於其地為人才品詩札一一擅勝惜儉
於氣魄一種郊寒島瘦之意時存筆墨之間任人以於
陵誚之而苦心孤詣勿避也遺有涉園詩草應韜將序
而梓之

劉忠字遠孝謙之子少孤能自立有文名為府學生試輒

優等崇正中學使侯公峒曾見其文丰骨珊珊岸然獨
 異愛之甚學食廩有年甲午遊白下時補考之令最嚴
 忠難之飄然棄去披錙以老康熙中復漫遊毘陵過武
 林受戒於靈隱晦和尚歸有詩名放言草刻未竣遂卒
 年七十三

吳江字淡生南城禮義坊人少補諸生力學嗜古登作者
 之壇一時推為龍象晚築室獨居顏曰耳園積書千卷
 於內閉關尚論自先秦以下各有條理一時鉅公皆兄
 事之生平重聲氣薄裘馬晚雖處約而恬澹自若有睥
 睨一切之致所著諸篇俱藏於家僅西湖草楚聲香心
 韻三種梓行

國朝

許捷字一三本姓陳赤土人籍隸南昌增廣生天才曠逸
 目數行下總角時父鉅每授與義即誅然已解為文泉
 思瀆湧制藝古辭兩擅其長窮年博綜凡經史子集任
 舉一義無不本本原原時有陳書稱之稱七試棘闈丁
 酉庚子幾入彀以字句已之遂樂意林泉閉戶著書都
 人士咸奉為楷模迨今子孫登科名列仕籍遊黌序者
 數十人

吳克生字文卿十六都黃笈人天才卓邁庚子魁江省辛
 丑中會副雖弱不勝衣而鼓其雄心不奪幟不已甲辰
 登第猶有中眉之嘆扶病南歸卒於舟樞返章門大司

馬李梅公先生暨諸同人向江干泣而誄之克生事親孝居喪守禮不踰服除獲雋北上歸夢炊臼卒無嗣才豐而命嗇士林惜之

陳之璠字負若十五都筴溪人九歲能文弱冠補郡弟子員雅為當事重言矩行方凡薦紳先生賢豪長者往來贈答罔弗心折秉鐸鱣堂以聖賢為期歲辛亥與修縣志邑令張理庵有學追班馬之額著有寓筠處遊南國諸草無病而終

朱超敬字遠思號芝亭社山人家繩之子性嗜書恥言財帛弱冠應童子試為郡伯賞識拔冠一軍與兄愷敬同補弟子員每試輒高等然心猶歆然乃入廬山僧寺閉

戶讀書三年凡五經性理諸史百子及秦漢大家之文靡不講究淹貫為文光燄奪目書卷之氣溢于行間壬子選拔入成均三應季考皆第一名噪京師一時名流皆折節慕之與韓慕廬徐方虎先生最相友善隨入北闈同榜中式是科徐健菴主試得超卷極擊賞稱為南州一士癸丑會試得而復失健菴諭慰之乃評序其制執謂可與慕廬頡頏歸家見母年高髮白不忍遠離無復公車之想親友強之曰顯揚未可必而空負愛日之心吾不為也家居事母而外惟日課子諸子文名皆振于時年四十九而卒生平著作甚富以寅卯賊燬其居悉為灰燼今所存者惟東園制執東園詩集諸說折衷

而已

陳九疇字乾錫者英堯佐子也性孝友負雋才食貧力學時人為之避席世居赤土遷居縣治趾不及公門而毅然以一縣之利弊自任順治甲午奉

旨清汰浮賦九疇不避斧鑕就質公府賦役因之釐正尋編為全書高安得以慶更生九疇與有力焉邑舊無志邑令張理菴創始修輯九疇領袖董事年未六旬閉關課子以自樂其恬淡之性

何至清字瑞興號逸園伍橋馬山人少穎異作文立就學使豫章侯公奇其文目為山川正氣拔冠縣庠與同邑劉九疑友善贈有尺俗逢人咸罵癖論文中酒近詩任之句生平著有易經集要歷代忠孝摘畧遭甲寅寇燬于火僅存課兒古稀望八諸草行世子九人列膠庠者六登賢書者一年逾八十而卒

吳成濬字源長龍山人品行端方學問淹博精于韻學著有竹園詩集劍邑祭酒羅大任為之評點以詩書傳家後裔科甲蟬聯簪纓繼起皆成濬積而有待之報也

楊一璉號節菴城南下坊人髫年失怙值兵亂母周淑人攜避于以易山璉囊書相隨不以顛沛流離廢業弱冠隸于縣庠試輒冠軍領康熙己酉鄉薦公車七上不第爰以知縣改諭鄱陽振興學校造就人才十四年疊疊不倦庚辰以幼子蘓臣第進士力請解組時諸子諸孫

多列鬻序璉杜門不出惟嚴庭訓壽八十四終

熊翼字羽成高明門外人少孤事母至孝祖楫宦橐蕭然常饘粥不繼翼力學益堅及長貫通經史下筆千言立就屢試冠軍先後學使者及郡邑大夫稱為名儒咸尊禮焉設教筠南最多士以聖賢之學一時高邑名卿士半出其門康熙癸卯壬子兩中副車所著有毛詩精蘊三禮會要太極通書正蒙諸解留餘堂詩文稿等集遷居南城仁濟坊

熊昂字耳玉十六都熊坊人同宗叔祖羽成及門之高弟也秉姿英敏持躬純粹弱冠補弟子員旋食廩餼試輒高等與業師羽成齊名人稱二熊沉酣經史尤究心諸

子詩傳古序及諸家詮解著有詩經廣義後裔弋科名者遂以毛詩世其業十試棘闈屢薦不售康熙癸酉科歲貢壽六十有八終

徐旭字公升號碧峯北里人自幼穎敏好學嗜古為文理法精察康熙丙子舉于鄉丁丑成進士大中丞司馬公聘主豫章講席一時名士盡出其門初授貴州鎮遠知縣行取陞吏部驗封主政辛卯奉

命典貴州鄉試未出京而卒布衣殯殮之外一無長物賴同鄉贈賻始得扶櫬歸里生平著述甚富惜多散失所存惟碧峯文集待刻行世

吳蒼璧字次琮邑庠生龍山人雅工詞翰博極羣書尤留

心經學貫串漢唐以來諸儒先之說一一折衷其是非
文行兼優名噪豫章時馬見五大中丞有草廬嫡骨傳
衣之目子三皆有文名人稱慈樹三珠後以孫霽貤贈

貤贈修職郎

朱之辨字訥士社山人進士之問之兄天姿粹美學問淹
通為諸生時卓卓有聲以選拔入監中已卯北闈領鄉
薦潦倒公車二十餘年得而復失者數次人有勸其就
邊缺者辨不聽窮益堅而志益厲至癸卯捷南宮知湖
廣新田縣飲冰自矢務以德化民不事筆筭新邑多盜
黃勞巴李真為渠魁皆忤逆不孝辨緝之到縣諭以理
法感其天良二人相對悲泣辨察其悔罪情真使充捕

役贖罪後改行孝養急公捕賊地方寧謐以撫字心勞
卒于官二人負母挽輻哭送數百里迨西陲用兵選取
技勇二人皆膺武職其化頑為良類如此辨仕宦五六
年家徒四壁柩歸貧無以葬戚友助之子若孫皆入庠
序克繼家聲

楊蘇臣號復齋南城下坊人世清之孫一璉之子志僑之
父雖累世科甲仕宦蘓臣為清白吏後裔貧苦讀書過
目不忘弱齡冠縣庠登康熙丙子鄉薦庚辰成進士循
循孝友累足公門族黨無間言歲丁亥謁選吏部年未
四旬忽以疾卒于京鄉之縉紳大人無不撫柩而痛其
經濟之未展云

歐陽烈字芑孫號恕菴碧落菴人生而穎異博通經史尤
精于毛詩左傳類能發其旨趣年十三補弟子員旋食
餽聲名藉甚學使者拭目每稱為淵博之士康熙庚午
己卯兩次薦卷以數奇終老明經為人孝友幼失怙恃
事兄如父蓼莪之痛與棠棣之懷終身勿替且方正不
阿慎于取友其所與遊皆一時賢豪晚年猶手不釋卷
子若孫先後登科皆其庭訓之效云

吳瑗字豐玉號石齋龍山人聰穎嗜學動依禮法方十齡
時滇藩倡逆草竊蹂躪家人避寇轉徙瑗扶掖母行足
疲憊弗少倦稍暇即肆力經籍為文沉刻不捨人牙後慧
年十四補弟子員試輒冠軍頌困于鄉舉再薦弗售遊

京師鉅公名流爭相引重瑗不事逢迎遽拂衣歸抱病
經年猶日繙經史及諸儒先書不輟後學經其指授多
所成就晚尤喜象山集謂其識見超朗議論簡直可接
濂洛一派易簣之夕語子弟曰讀書數十年苦于道未
有見惟此心稍不放逸學問之道無他汝曹勉之臨川
李少宗伯紱為作墓表謂

國朝西江積學未遇者惟南康干達士先生瑗其亞也文
載穆堂集南豐湯少宰倓寧化雷銀臺鏞亦皆有傳所
著有石齋文稿行世子為良有司為名宿皆瑗庭訓之
功

徐爾昌字禹拜號既亭宮詹敬齋先生之冢子生而穎異

十歲為文多奇警先輩咸器異之年十六名震膠庠十九中本省已卯副榜至辛卯獲雋為人丰骨英爽為文以廬陵為法工楷書出入鍾王中朝先達咸以鼎甲相期乙未壬辰兩薦不第宮詹公歿哀毀盡禮服闋思以文章繼先人業而玉樓遽召未竟厥志時年四十二當時惜之人品學問詳寧都太史李龍官傳

鄭洞字開心號樸齋米嶺人祖仲顥有隱德父璉辛卯鄉薦洞幼穎不凡長益肆力于學經傳子史詩古文詞靡不究心弱冠遊泮試輒高等雍正癸卯選拔入成均每會課司成得其卷必擊節嘆賞有國士之目兩試北闈不售請假歸里閉戶著書丁巳授峽江教諭毅然以振

興文教為已任却脯脩捐薪俸勸文昌閣學規準乎鹿洞造就等乎蘓湖峽邑科名由此益盛其地有玉筍山頗稱名勝間與二三名宿登臨賦詩一觴一咏怡然自樂蒞任未久忽以疾卒峽人士思慕不忘所著詩文稿多散佚未及付梓後有達人幸索遺文而表彰之

吳琇字秀玉號耳軒龍山人生而聰慧務博洽九歲能文弱冠補諸生試輒高等秋闈四薦未售雍正癸卯以選拔貢成均乙巳

詔舉孝廉方正學使沈公翼機以其名檄學具薦琇力辭弗就乙卯始舉于鄉丙辰成進士諸公卿重其名有欲為薦舉者琇笑而謝之秋初歸里杜門著述惟訓後學是務

經史性理諸書皆手自校訂為文宏博淵深詩尤古雅
遠近就正者踵相接琇溫厚循謹貌若不自持然內守
堅確雖細行必檢天性孝友教人亦必以忠孝謂士先
德行而後文菘生平著述甚富不自藏稿所存有耳軒
初集惜春草等篇嗣刻行世子長列清華館職次由訓
導陞貳尹以勤勞卒于官羣稱世有哲人

朱炯字季楊文端之季弟也秉性純粹嗜學不厭讀書端
坐默識不事吟唔而體認精切凡五經性理諸史百子
及秦漢以來大家之文靡不貫徹弱冠補弟子員旋食
餽名噪膠庠甲午舉于鄉四上公車不售朝卿有以文
學保薦助教者堅辭不就任武寧教諭以興起教化為

已任一切贊儀俱不受以給士之貪者寧邑文風未振
經其指授為文皆有法度自是科名蔚起皆曰朱先生
之力也以內艱歸哀毀骨立服闋無意仕進樂志林泉
居家閉戶著書暇則與二三知己徜徉林麓間為人寓
精明于渾厚不言人過失而詐者自獻其誠里有紛爭
一經剖析無不立解年六十卒子二人皆登賢書

劉敏昌字遜及西陽人弱冠補郡庠旋食餽戊子鄉試已
獲售而復失癸巳

恩科又備卷在學三十載試輒前茅博極羣書一切詩古文辭
援筆立就有如夙構孝友根于天性宗族鄉黨無間言
人有忿爭得其片語即釋過道瑾必捐貲殮埋學校公

論謂一時文行無有出其右者舉以應優行之選上之學使沈公加看語云居家孝友品行端方薦牘方就而卒惜哉所著有西園制菀及文集詩集數十卷待刻行世西園其別號也

吳錫祚字公純號惺齋黃笈人天性孝謹篤學勵行為文矩步先正教邑潘太史述祖見而契之有金和玉節之評為人寬和坦易生平無疾言遽色中年失怙哀毀骨立服闋補弟子員益肆力聖賢之學自構逢源書屋朝夕與弟子討論雖屢困棘闈不以得失介意乾隆丙辰其子獲雋遂謝舉子業日以戲綵北堂為娛年六十餘歲一夕論文媿媿不倦脩閉目而逝見者駭勸所著有

史學要義四書啟蒙詩經啟蒙管見存言

劉友瞻字紹長一都金沙西村人讀書多識躬行實踐事父母至孝待兄弟至和立言必信制行必謹平居立志每以聖賢為必可學其于性理近思錄終身蓋疊疊焉自奉甚儉然濟人利物絕不少靳有某將鬻其妻以償逋負者傾囊給之夫婦始全其行事大率類此遊其門者詔以先行後文嘗謂小學一書是吾儒站立脚跟處又謂

國家以經義取士須從聖賢分際確有體認方能發為文章科舉之學即心性功夫也窮年矻矻偃蹇諸生中垂五十年乾隆辛酉年八十猶攜其子姪就鄉試是科其

子發純以弋陽教諭中式越甲子猶與試殿子婉辭止之曰吾精力尚健不為疲也年八十五歲卒著有自警十則周子通書張子西銘正蒙直解六卷

徐永欽字綸章號葵園仁濟坊人佐之子天姿穎異識見超卓年十五郡伯李公如喬拔冠童子軍補郡博士弟子員旋食餼試輒冠軍一時名宿咸心折之凡經書子史及諸大家文一寓目數十年不忘于毛詩三禮史記左傳尤得其旨趣鄉闈得而復失者數次歲丙子中丞馬公調取豫章書院肄業掌教熊漁濱先生以大器目之康熙再壬寅以歲薦授撫州宜黃訓導實心造士學中祭品田產數十年未清之物悉為振興督學趙公巡

按周公嘉其才學以匾贈之致仕後年踰八十日以音韻課授孫曾生平氣宇豪爽風度飄逸即談諧談論無不風雅宜人至其才堪肆應料事多中又為餘事

朱守誼字正叔號容齋超敬第三子也自幼穎異為文若出夙構與弟守詔同受知于學使邵公補弟子員學分郡邑各冠一軍庚午壬午兩次薦卷得而復失不以介意兄弟四人極相友愛奉長兄曰鳳如嚴父為人和平樂易喜怒率其天真族太博文端深重之嘗為其子必坦行冠禮擇請大賓時貴客盈座而束帛輿馬迎誼人謂何外求為答曰吾欲孺子師公範也族曾伯祖太僕密所公高邑先輩中之有聲錚錚者後嗣僅存一綫貧

高安縣志 卷十四
宴無依誼減食飼之又鬻田數畝為聘婦聯生二子一女而歿誼囑其子之元撫其孤寡居之食之無令失所太僕之得延其嗣者誼之力也年七十有五卒之前三日飲畢忽曰明日勿進食惟飲水以淨腸胃吾某日當逝矣來視者晉接如常尚與談說鈴所載奇聞異見事至期端坐而逝

吳槐元號在中龍山人蒼壁之幼子也祖父皆以文學著槐少孤從事堂兄識鴻肆力于經史子集所作今古文詞一一出自機杼而德器深遠不尚慷慨激烈之行人有橫逆犯而不校其文章品行咸推重焉戊戌受知督學王公後屢為哲匠宗工擊賞邑令欽其雅望延見之

論文竟日一語不及私學師郭欲以優行舉槐力辭不就庚午始以年資貢禮部生平著述甚多惜散軼未獲成帙刻有試草行世其長子以副貢授廣昌教諭三子以優貢授寧州學正贈槐元修職郎如其官四子循例分發浙江署天台縣丞孫庚子舉孝廉曾孫癸丑歲進士科第聯翩見其貽謀者遠云

雷寅字東甫筠南山畬里人年二十補弟子員即食餼屢試冠軍甲子領鄉薦計偕連次未售為人端嚴正直不與外事日以詩文與諸名士相倡和先時大父創有書室稍為擴之顏曰斯園購輯圖書摩挲其中著有易象叅解春秋傳質義詩論周官畧義公車雜錄以帙繁尚

未付梓獨畚山詩集與斯園集制菽畧梓以行遠

朝廷詔舉經術郡縣敦趣其書繕寫以應聞者方為拭目歲

壬申赴

恩科會試中途疾作行抵東昌卒于逆旅年甫四十昇櫬旋里

士林悼之

徐作梅字庾仙北里縣後人稟姿聰慧賦性謙恭年十七
補郡博士弟子員屢試冠軍鄉闈屢薦未售博覽羣書
寒暑不輟為文少趨先正不獵時趨雖數奇不偶不怨
不尤居家以孝友聞授生徒首重品行門下士多賢達

雍正元年

詔舉孝廉方正邑紳士公舉梅應力辭不就為諸生三十餘年

凡歲科觀風月課諸考無不優錄而獨難于科第僅以
歲薦終士林咸為之惜

陳洪淡字永公荷山人天姿聰穎總角時志存遠畧方就
家塾章句之暇嘗竊觀史鑑一日見范文正公傳喟然
嘆曰士君子讀聖賢書必如是方不愧聖賢種子族中
先達成奇其言弱冠補邑博士弟子員屢試冠軍鄉闈
得而復失者數次恬然以義命自安讀書過目成誦無
分寒暑手不釋卷為文準先正典型遠近名宿無不樂
與偕和父早喪事母極孝家雖貧館穀頗豐未嘗為一
身計安飽資給昆季必囊空乃已乾隆元年

詔舉博學鴻詞時副憲王公紘為江省方伯悉其文品舉以應

廷試疾作書卷未畢見遺臨川穆堂李公見其詩賦策論深為扼腕年四十二膺歲薦明年以疾卒聞者莫不嘆息陳肇元字掄及城南小街口人性情豁達才具優長家貧好學為諸生屢試高等中丞白公督學王公取入豫章書院肄業各郡名士樂與唱和事父母敬養備至本邑宮詹徐公悉其文品延為西席建宗祠修族譜皆其倡率以歲貢授定南訓導蒞任四載實力課士不徒以文菽相勗歲壬申定邑苦旱米價騰貴元與邑宰何公設法救荒親至鄉村勸諭富戶出粟周濟全活甚眾士民以其事聞于府道督學各憲皆為匾旌年七十五卒于

任囊無餘資士皆涕泣柅旋邑人感其賢爭相贈贈

吳家修字廷獻龍山人邑庠生為文出入經史理法兼優教育諸生循循善誘遊其門者多知名之士以數奇不獲上進退守家塾督課後嗣其子以明經候選孫亦蜚聲賢序壽八十有五而終

朱曰俊字翼之一都清湖人自幼勤學垂髫能文廿歲遊泮旋食餼時有國士之目以數奇不偶終老明經其于孝友大節毫無所虧訓子姪諄諄以勤儉為本以道義為閑又恐後人不能恪守自顏其室曰永思遺訓其為人如此迄今後嗣代有賢達

塗紹周字宸臣北城縣下人品粹學純為行輩欽仰食餼

郡庠勵志潛修以講明聖學為己任誘進後學先道德而後文藝遊其門者皆篤實之士年六十五未竟厥緒而卒至今猶令人憶其芳軌稱道勿衰

朱之問字裕夫自幼穎敏非常若有夙慧十歲能文出語驚其長老家貧未能從師與兄之辨自相切磋名振一時人有雙珠之目中康熙乙未科進士時新例教習三年在京二載得病告歸卒于舟豐于才而薄于命人共惜之

陳洪元字乾先荷山人器宇磊落弱冠即以古人自期為文自成機杼無一語寄人籬下詩古文詞尤為擅長書法精工酷類元常逸少性至孝善體親心父守創登顯

秩元閉門掃軌左圖右史以自娛歲甲辰登賢書公車北上場事畢不問得失一肩行李而歸由是絕意仕進日與族昆季能文者窮迴溪涉高山飛觥浮白于荷華峭嶺中興至豪吟有飄飄物外之槩年三十九先父卒士論惜之

朱曰鳳朱守詔俱起敬子學有淵源郡邑二學屢次冠軍聲名藉甚鳳以選拔登戊子賢書詔以選拔終俱有黼黻之才未盡其用時論惜之

陳其曾字公唯赤土人康熙乙酉鄉薦取直慷慨凡族有爭執其曾不徇勢利據理排解人咸服其公正

陳光瑞字輯侯赤土人博古工書康熙辛卯鄉薦為人和

藹而胷有涇渭與族兄弟叔姪處不為岸異遇事一衷于理亦不苟同交遊皆賢達士至今人猶思之

陳健德字庶資赤土人郡廩生質敏好學涵養深邃不矜人以識而人不之欺不多人以能而人莫之侮乾隆丙辰膺歲薦改授

恩貢

劉廷元字掄三一都塘此人邑增生學問淹博屢列前茅教育子姪循循有法惜天不假年未遂厥志凡屬知名之士咸為惋嘆

朱必考字最臣良溪人中雍正元年

恩科舉人歷任福建安溪縣知縣甚有政聲與修邑乘惜未竣

事而卒

謝家鳳字梧岡稠塘人雍正己酉科舉人任永新縣儒學教諭與修邑乘惜未竣事而卒

徐源言字崑來仁濟坊人邑廩生與修邑乘惜未竣事而卒

梁家駒字遠及溪上人邑舉人與修邑乘未竟而卒以上舊志

吳衢字天行龍山人家貧嗜學博極羣書其為文縱橫雄悍初入泮名發元在庠十載名日起戊辰歲試衢厭文

風卑靡別求生新衡文者竟以險僻黜己巳更今名再就童子試邑侯盛公鍾賢擊節歎賞拔冠一軍旋復為

縣學生學使者邵語衢曰吾昨失子今復得子何異歐

陽之斥劉幾復取劉輝耶去其軋茁歸於醇雅吾不能
量其所至矣癸酉登賢書同里朱文端公其榜首也癸
未會試吏部主政張公最首薦草榜已定適為他房有
力者所奪榜後張公備語其由深為惋惜衢幼時有道
人見曰此一榜兩秀才也取名曰衢後卒如其言生平
著述甚富卒時子幼散失殆盡惟四書見解并試草尚
存待刊孫乾隆壬子歲貢

鄭仲星字日生號輝齋米峯人生平喜讀書絕口不言利
其為文也理根朱程骨摹柳曾應童子試極為邑侯陳
公所賞拔年十八補弟子員順治甲午鄉試房薦甚力
以數溢置之康熙壬子科文已入彀因孟莩有小疵又

不獲售然其文俱刊刻行世膾炙人口矣中年以往尤
究心理學讀書於青霞道院杜門不出者十四年所著
有四書彙解詩經辨疑全史策要曲成後學雖力與心
違未及梓行而索稿抄錄者已遍鄉塾矣且坐春風沾
化雨者類多名顯時號輝齋先生後裔獲領鄉薦

吳學瀚字廣思號澹園龍山人丙辰進士琇之子也年十
四補博士弟子員十五食餼二十四舉於鄉雍正己酉
受江南大中丞聘充同考試官分校書三房辛亥奉部
截取觀政刑部癸丑會試中十六名經魁官庶常生平
讀書務求根柢在史館下筆千言洋洋灑灑同輩罔不
推服時江南方公靈皋主教習臨川李公穆堂卓立文

壇瀚遊二先生之門得其指授故作文皆有法度中程
式性恬淡丙辰告假隨父歸里其時父翼鑠甚原可即
出而瀚堅卧不起宮袍侍養依依如孺子慕嗣後豐草
長林課子姪以詩書交族人以誠實雅度汪洋人以拂
逆相加從未見有愠怒色年九十而卒所著有澹園文
稿文集待刊

何天秩字季庸號不倚伍橋人郡增生秉資穎異讀書過
目成誦詩古文詞卓然成家與劉嶽生先生倡和極多
刻意進取屢薦不售賣志以歿著有擬捷策畧不倚堂
詩稿蘓長公文集評點待梓行世

吳應尹字三聘城南石橋人質穎異淹通經史過目不忘

弱冠補博士弟子員試輒高等後雖棘闈屢困而嗜學
之心未嘗稍懈為文崇雅黜浮一時名流遊其門者皆
各有根柢著有梧軒文集待梓咸稱為梧軒先生

熊心字敬乃號存齋熊坊人秉姿穎異讀書數行並下過
目不忘年十六補弟子員文章秀拔屢試前茅旋領康
熙癸巳

恩科鄉薦會試禮闈薦心為房首以額滿見遺後遂淡志為人

素性豪邁遇名山勝境輒加題詠以寫曠懷翼燕之謀
詩書為業三子俱列膠庠次則食餼充貢孫曾亦皆遊
泮著有存齋詩草待梓問世

何蔚然字豹文伍橋人自少個儻不群潛心經史以郡庠

高安縣志 卷十四 文苑
食餼每試輒列首選雖屢薦不售志不少衰嗜學工文
教育多材一時學者咸宗之著有四書文稿春秋文選
待刊問世

王家瑞字呈斗龍池人遷居南城下坊弱冠補邑增生為
文出入經史理法兼優教育諸生循循善誘屢薦不售
遂退守家塾督課諸子繼志夤序享年古稀以壽終
吳應奎字宿五號毅庵龍山人性嗜學以尊人竹園公肆
力墳典又不肯為制舉業思欲一大其志家雖屢空而
祖鞭益奮幼補弟子員秋風屢躓了無愠意日與二丈
夫子閉戶講學卒後次君以孝廉出宰而諸孫或由進
士任劇或膺卓薦守郡

恩綸稠疊必于子孫信不虛云

徐啟信字成之號石亭邑庠生南城石橋人秉性誠樸讀
書力求根柢為文雅正清真卓然先民矩矱一時遊其

門者罔不沐其甄陶著有易經講義性理集要
吳士謙字益受號牧莊龍山人邑名諸生素孝友每與季
弟論辨往復交相為師間出所學推益於人一時知名
爭納贄焉性坦易有干犯者笑而謝之居恒以儉率人
其季弟與冢君先後登仕而食不兼味衣不完縷終始
無移厥後

單恩應得封階語人曰此老頭巾卻有味何必因子改邪及
冢君循例請之益歆然自下壽近八十而終

陳遠新字丹麓號雲莊赤土上官庄人天性穎異讀諸子
百家書會心獨遠為文不拘繩墨自成一家言中甲辰
科副車任宜黃縣教諭其著書融會貫串洞見古人本
旨太守沈泊村甚敬之而為之序乾隆辛未與修邑乘
剛正不阿載筆極其嚴毅泊老築別墅于白雲莊課讀
之暇種花雜圃以終餘年故自號為雲莊叟云

吳化時字雨滋龍山人性崖岸不苟言笑雖家庭之習舉
動必以禮博極群書尤精楷法試輒冠軍乾隆戊午以
詩經第一名中式七上公車中壬戌明通榜治家極拙
北上常幘被自隨潦倒一生賣志以歿士林憫焉刻有
珠水試牘行世

熊定求字曰章號我堂懋瑚之孫幼貧窘矢志讀書以繼
祖志有弟四人連床督課菽水怡然年十三入郡庠試
輒冠軍文彷彿金陳前後學使者多器重之一郡咸稱
祭酒焉薦於鄉闈數次卒不售乾隆庚寅貢成均以

單恩例選教諭子孫並列膠庠仁濟坊人

吳含章字煥唐龍山人歲貢生博通典籍作文縱橫排奭
鎔經史之精而自出機杼見者以為李石臺章雲李再
世弱冠應江西己酉科鄉試主司擬魁累日以二場不
至見遺易二房刻文郵寄大加獎借深為期屬大銀臺
朱愚峯先生延主西席薄遊都門與諸前輩論古今口
講指畫源委秩然烏程泊村先生來守筠陽拔冠多士

進謁之餘時聆指受而所學益醇則直可躡張曉樓座
矣然鷓羽退飛六薦不售僅以明經終所著有存餘稿
子若孫先後登科餘亦蜚報庠序

徐圖字文河九都協塘人賦姿穎異嗜學絕倫為文不趨
時好且才思敏捷落筆千言立就年十九督學王省齊
拔冠邑庠隨食餼屢試冠軍報名籍甚一時陳木齋雷
東甫陳扶五輩爭相引重遊其門者多所成就所著有
文河時菽稿藏於家

熊學淇字衛瞻號竹莊熊坊人甫弱冠補弟子員旋食郡
餼以年滿充正貢學問醇粹為文意到筆隨千言立就
法度悉準先民訓授生徒雅稱善誘計獲成立者不下

百餘人待兄弟尤極友愛讀書時於床課誦後雖分爨
所得館穀不以自私是真經明而所修者享年六十有
三子列成均孫入邑庠著有歷試文草竹莊閒吟詩集
藏家待梓

吳悅生字翼受龍山人學山次子也性聰穎讀書過目成
誦作文幽曠宛委讀者無不歎心經甫入泮即冠郡彥
因體弱多病父母屢以勤讀書之悅勸苦倍至不避寒
暑私讀帳中帳為之黑而文彌簡刻精深詩喜盤硬語
書法則追摹小歐督學金檜門優取貢部肄業成均王
大司空安國管大司成事見而奇之拔冠多士每稱譽
於公卿間以為豫章翹楚竚見干霄入雲然體羸不耐

北地風霜因告假歸尋病歿於霍山官署年僅二十有八所著拙吾堂稿吳江周旭之先生為之點定

陳規昌字和五尚書匡左公來孫博聞強記嗜學不倦嘗受業於吳興沈泊村極目為青雲之士在諸生中屢試高等名噪一時乾隆乙酉舉於鄉生平砥礪自立異紹前徽年屆五旬邁疾而卒所著有補堂詩文草編輯有歷朝文鈔待梓問世

汪桂字清遠號月林四都汝塘人幼穎慧甫就學詩文援筆立就弱冠補邑弟子員凡經史諸子百家必彙輯蒐覽寒暑不撤尤於四子書統會叅攷錄寫繙駁章疏節解明晰通融永為案頭家珍集有歷試文鈔刈餘詩草

待梓惜積學不售僅以明經老壽七十九卒子中乾隆丁酉副車

王洛字潤程號慎堂城南連通坊人祖居四十五都赤溪梅口生平篤學好問至老不倦尤精音律一時遠近知名士遊其門者甚衆著有慎堂制菽郡伯吳興沈泊村及鳳儀書院山長保昌胡靜園先生等為之序

陳瑛字扶五荷山人好學能文品高行潔餼邑二十餘年士林推為老宿遊其門者多拾芹登第所著留耕堂稿四書講義族少司農木齋叙之

魯點字聖與二十八都幽嵐淇園人性敏學優規言矩步補邑弟子員益潛心經史揣摩制菽棘闡累荐不售猶

循循不失故業晚集生平所為文一百篇經名公大人
評定者欲付梓以家貧乏資未果未幾卒士林惜之
陳弼靜堂赤土人天性篤誠旁通載籍制藝本先民矩
矱兼工楷書以詩古經解入彀受知於督學張公補博
士弟子員謝周兩宗師俱屢拔前茅因鄉荐數奇貢入
成均乃晉秩請封為母金太恭人八旬壽居家恂恂孝
友定省之餘即與諸昆季及二三知名士相倡和于挹
翠軒一時從遊者咸獲觀摩之益今其子蜚報費序足
徵淵源之有自云

陳上璫字玉仙歲貢生赤城洲上人弱冠入郡庠旋食餼
潛心經史潔己好修克繼父志為文法準先民又極豐

湛試輒冠軍以棘闈久困遂淡然舉子業而教育生徒
循循善誘從遊之士得所成就者甚多著有蔚霞文集
良堪問世臨終時戒勿梓行尤足徵品誼之高

徐凌雲字遇仙號醒庵讀書過目成誦為文則精深沉刻
不落時蹊弱冠入郡庠旋食餼試輒高等時長兄三人
比肩出仕欲為之循例報捐辭勿允惟退處家園暇則
賦詩以見志年屆五十而卒子登太學

熊徽字琴章號熙亭少嗜學母病數年日侍湯藥仍手不
釋卷弱冠補弟子員旋食餼文沉雄典博與兄定求齊
名屢試高等癸酉鄉試已入彀以額見遺課徒則循循
善誘一時知名士多出其門年未六十而卒二子報振

翼序得紹箕裘焉南城仁濟坊人

吳燕翼字詒孫龍山人少孤聰穎異常過目成誦于十三經諸史弱冠時便能明其大概惟周易性理二書尤為所篤好年十六補邑弟子員旋食餼作文原本經術詩古悉宗盛唐時當事有理學才子兼而有之之評士林無不推服遊其門者亦多所成就為人剛方自矢凡事關倫常毅然獨任有古大儒風惜年未及五十而卒生平著述雖富每多漫滅僅存愛日堂稿待梓

幸嘉謀字廷猷郡庠生富樓人博通經史為文沉毅奇警試輒冠軍應科舉累荐不售而好學之志未嘗少懈性愛山水與諸名士遊集倡和題詠甚多悉得溫柔敦厚

之意晚年恬退家園日以造後學為事子弟十餘人並蜚聲翼序皆其熏陶力也所著山水樂集桂峯草錄壽九十而終

涂泰程字履安郭峯人少穎異善詩為文自出機杼不落時蹊鄉試屢荐不售後遂友教數郡卜東萬太史皆出其門曾序其詩文藏稿老仍篤學有對鏡纔知鬚半白觀書更覺眼全青之句幼失怙母年九十四事之如一日又至孝人也品端望重鄉里至今誦之

吳化榘字良才龍山人幼嗜學淹貫群書為文出入經史年二十補博士弟子員後雖屢困場屋絕無怨尤意惟守家塾中嚴課兒孫著有品山書屋文稿待梓厥後二

子並登鄉榜諸孫亦多列膠庠人以為積學之報云
幸日蔚字秀林號春圃富樓人好學不倦凡經書子史務
抉其奧為文卓然成一家言性豁達尚氣節尤孜孜以
汲引後進為心遠近之士賴其陶成者不一而足平居
與兄弟連床倡和彙為一帙將有待於梓行用表其怡
怡之意

高華字實夫西辛廂人而穎慧飽飫經史早歲蜚聲
序試輒優等荐而不售者數次晚猶力學勿倦舍東築
養正書院裁成後學著有存彞堂十二則行世年七十
有四而終

幸日章字雲煥邑庠生富樓人好古力學至老不衰為文

清真雅正法度一準先民晚樂山水理極精通所至輒
加題咏而督課後嗣惟以正誼明道為拳拳深得溫公
之遺意享年八十有三而終

傅錦字雲織號鈍齋歲貢生珠湖人少聰敏嗜學寒暑不
輟應童子試以冠軍遊庠旋食餼為文原本經術程式
先輩不落時趨棘闈荐而不售者三次遂以明經老至
樂育生徒德行與文章並重遠近之士沐其教澤者無
不得所成就晚年學益醇而品益高儒林敬服公舉鄉
飲正賓洵足為多士楷模也著有四書講義易經參解
待梓問世

黃述祖字宜孫邑增貢五都翰溪人賦質聰穎讀書過目

成誦為文灑灑洋洋不煩繩削而自合弱冠補博士弟子員試輒高等咸以遠大相期後雖棘闈屢薦未售初不以得失介意其教授生徒諄諄不倦一時從遊之士藉以成立者甚多晚歲循例加貢而嗜學不懈凡所著作士林皆什襲珍之現在後嗣玉立詩書之澤留貽正遠耳

陳守敬字純甫瑛之子高才博學試輒冠軍食餼郡庠從遊雲集郡守楊公仲興聞其賢加禮待之惜賫志以歿未竟所施著有文山詩文待梓

胡守業字紹基號竹泉城南上坊人少孤苦事母孝家貧讀書精詩古文詞工書法弱冠補弟子員試輒冠軍膺

選貢 朝考以知縣用作令黔之桐梓多惠政去後邑人以衆毋思之生平著作甚富以力窘不及梓行在籍倡修邑乘未歲其事年屆服政而終士林惜之子舉孝廉詩書之澤正未有艾云

吳集禧字疇五號德齋龍山化梗次子也生而穎異十二歲能文嫻于詩古兼工書法應童子試數次未遇遂奮然納太學以思上進甫冠果得舉于鄉著有內省軒課藝讀其文者咸以大魁期之惜年僅三十未獲大展所學數限之歎

劉芬遠字蘭軒西陽人賦性穎異淹貫經書子史弱冠補博士弟子員試輒冠軍食廩舉優文名籍甚生平處事

以理直氣壯為主行文亦以理氣為宗論者咸謂其試
藝近韓潮蘓海詩古則李長吉之流亞鄉闈屢荐不售
士林共惜所著芸窓課藝待梓行世

熊中發字柏雲號蘊田原名中恒定謨之子郡廩生幼聰
穎過目成誦為文風發泉湧學使長洲蔣公亟賞之有
國士之目鄉試屢荐不售援例貢成均年三十餘卒士
論惜之南城仁濟坊人

丁德純字秉文火石丁坊人幼穎慧博極羣書年逾二十
補博士弟子員旋食餼名噪膠庠詩古文詞與年俱進
八試棘闈屢薦不售終於強仕之年文行兼優未竟其
用惜哉

幸日靄字瑞卿郡增生富樓人聰穎嗜學經書子史過目
可十年不忘構詩文援筆立就體裁力追先輩郡伯陳
極為賞識有經術湛深才思雋爽之目在學試輒優等
雖棘闈屢薦不售亦恬然安之所著有春秋正義詩學
指迷待梓

熊中翔字振千城南仁濟坊人幼穎異嗜學能文初應童
子試入郡庠屢試前茅肄業豫章書院每為當事所推
重棘闈兩荐未售後督課諸弟風雨連床暇則賦詩見
志惜年未四十而卒

丁正浩字瀚克邑庠生三十都火石丁坊人秉姿聰穎讀
書過目成誦經史淹通尤肆力於古文應童子試冠軍

旋補博士弟子員每屬筆洋洋灑灑千言立就法度一
準以先民後雖棘闈見蹟刻苦倍深學日進而文益工
著有三餘草良堪問世惜所志未展年近強仕而歿
游謨烈字旦成二十一都石泉人聰穎嗜學理探程朱淹
貫經史秦漢以來諸家之文無不博洽落筆千言立就
法度一準先民其時意氣豪邁誤應武試入庠旋棄置
補博士弟子員試輒高等辛酉丁卯兩科荐卷已入彀以
表文擡頭違式遂置之主司極為惋惜然雖數奇不偶
而披吟至老不倦嘗與當代名宿訂道義交又每遇事
闕文教輒慷慨肩領矢公矢慎經營盡善如建鳳儀書
院修試院考棚皆其卓卓可稱者生平著作惜多散失

張聲字若實城北高家巷人由縣試冠軍入郡庠旋食餼
後屢試優等鄉薦四次未售而學益醇品益高故游其
門者多獲所成就惜年五十一例應正貢而卒士林至
今重之

鄒新字日功號浣軒二十八都沙港人生而穎異家貧力
學弱冠列膠庠試輒高等屢薦不售所作詩古文詞均
有大家風味尤諄諄誨人不倦一時從游者甚衆多得
成立甫強仕而卒未竟其用惜哉

傅璘字荆璧號信齋珠湖人甫弱冠補博士弟子員旋食
餼為文湛深經術法本先民雖屢薦未售至老不輟哦
誦遊其門者多列膠庠而教育後昆蜚聲譽序尤徵家

學淵源惜將應正貢而歿

王茂煥字廷玉號敏堂十四都官莊人質敏好學弱冠補郡弟子員初應鄉試制藝便入彀旋以額滿見遺後屢試優等刻苦益深為文力追先輩詩亦日造唐人門戶其所著作皆堪問世是學有根柢者惜年歷強仕而賈志以歿也

黃堂玉字汝成號潤齋楓嶺人性質直家徒四壁力學不倦弱冠應郡試受知于邦伯沈泊村入邑庠潛心經學為文以雅正為宗所試輒列優等後雖久困諸生中而嘯歌自如時假吟咏以見志洵雅士也著有潤齋詩集待梓

僅存泉山古餘草双杏齋制藝以待梓焉年八十餘而卒

楊玉書字麟瑞荷林人賦性孝友秉姿穎異甫列膠庠旋食饌文名頗噪一時教授生徒循循有道遊其門者多得所成立而課子若孫列鬻序掇科名尤足稱盛人咸以為源遠而流長

楊玉鑑字英極荷林人性穎異十歲能文旋補弟子員淹貫經史為文典贍精深以數奇遂未獲雋嗣是訓課後裔津津不倦季子化雨由食饌授明經甲寅恩科

欽賜舉人乙卯會試

欽賜翰林院檢討

楊占鰲字連六號駕山荷林人邑廩生中乾隆庚子科副榜就職教諭質性純厚學業淹通讀書而外無他嗜好所著詩古文詞俱卓然自成一家督課子姪義方之訓尤殷殷不懈後皆貢入成均卒年七十有五

傅昆怡字悅亭珠湖人性孝友謙和寧靜耿介雖獨居一室儀度秩如嗜學歷寒暑無間為文幽秀峭折迥不猶人以院試冠軍補郡弟子員屢困棘闈毫無愠色年止四十有五士人惜之著有四書一得待梓

吳光緒字鴻業龍山人癸酉舉人衢之孫也少孤且貧然深自研求雖餽粥不繼而書聲琅琅徹戶外弱冠補博士弟子員旋食餼丙軒薦弗售壬子貢成均生平作文以

理達詞醇為主至為人沈靜慎取與鄉里尤推重焉近與修邑乘在局三載寒暑弗懈乃以垂成而卒

朱時夏字榮萬號樗亭社山人天性渾厚為文醇樸試輒高等設教先行後文諸生以次列庠序者百數十人乾隆己卯舉於鄉生平功深養到見道分明著有四書叙解待梓

劉見大字渾亭十一都西陽人幼孤苦事母孝篤志好學補弟子員為文法先正字學鍾王屢薦不售晚年成就後學多所成名著有毛詩講義待梓

廖璠字與若號魯堂南城上坊人生平言笑不苟甘淡薄謹交遊屏跡公門手不釋卷為文一準先正以歲貢授

臨川訓導歷任六載成欽品學及解組多士攀留不忍別公送化雨長滋匾額年七十有三

廖琛字思獻號璞齋璠之弟生平雍容和雅聰穎過人楷書步履鍾王弱冠遊泮屢試棘闈雍正壬子科領薦以額滿見遺遂入歲貢篤課兒曹年七十卒迄今代有賢達方興未艾

廖純字繡干號錦村琛之子性情曠達過目不忘甫弱冠府試冠軍補博士弟子員棘闈薦而未售年三十有三士林惜之

幸曰復字七來邑庠生富樓人賦性穎異諸子百家無不研究亦有纂集待梓為文奔放雄逸有古大家風嘗夏夜燈讀設帳避蚊忽有神揭帳而言曰隱者也後果抱才莫展年逾三十玉樓遽召士林深惜之今子孫克繼其志書香為不墜云

劉青芝字彥秀一都左橋人邑優增生少穎敏讀書過目成誦為文有大家風屢試高等庚寅科呈薦因額滿見遺當時及門多知名士著有試草待梓年早逝都人士深惜之

劉淑昌字書正號醇庵西陽人邑增生例舉明經進士天性穎慧淹通經史善屬文尤長于詩著有醇庵詩稿行世

朱霞光字明子郡廩生破山人淹通經史品格清奇屢試

前矛以數竒不遇尤潛心理學具特眼識其侄文端公
于髫齡教育成器及飛黃騰達讓不居功著有四書會
要古學秘授西園墨林詩梓行

謹按文苑之志別乎儒林而言之也舊志無儒林之目
品有可志概入敦行文苑則青衿始志布衣則弗志焉
此舊例始仍之三十年來共四十一人類皆力學未遇
賈志以歿者耳自今以往願我高邑諸生咸得騰達儒
林光昭史冊而不僅入於斯志已也邑令高以本志

童星輝字漢章號西園西溪人天姿卓犖學品醇粹弱冠
食餼試輒冠軍庚寅

恩科舉於鄉累薦春闈不第退而設教科甲芹藻之士出其
門者七十餘人生平詩似香山文似三蘇制藝在陶菴
大士之間而一種秀色天成及門諸賢莫及也兄弟五
人長星聚抱才早世三星垣力學應童試十餘次始補
邑庠四星耀小試三冠其曹丁酉登賢書留京邸與同
年萬和圃共筆硯每一稿出和圃嘆爲不如琴棋書畫
各臻其妙著崑圃制藝二卷幼星紀爲諸生二十餘年
庚申秋闈獲雋榜發主司自幸得江右名士一庭友愛
書香稱極盛焉

熊定飛字凌遠號雲嶠城北叢桂坊人新居觀西性穎異讀書過目成誦十五歲課白鹿書院即爲孫子未先生所推重肄業六年歸入邑庠試輒高等秋闈五薦未售而觀光之志至耄不倦甲寅

恩科

欽賜舉人乙卯禮闈

欽賜翰林院檢討爲文力追先正尤工詩著有錦水棹歌集唐律賦試草策學行世課讀後學成就者衆子領鄉薦諸孫蜚聲譽序皆其所教育也卒年八十有七

皮希牧字子超號寶齋菱塘人幼工文善詞賦童試古學冠軍入泮後屢躋棘闈乾隆辛酉年近七旬有勸以改冊邀 恩者曰以年老得名已非吾志况未及而作僞乎嗣後不入場者十餘年癸酉秋孫曾悉赴試樂而同行一堂四世角藝龍門精神倍奮是科

欽賜副榜生平體父兄之志成就後昆出已分學穀百餘石爲延師課讀貨歲以爲常乙未丙午饑出積穀千餘石濟貧因此家無長物至老猶坐絳帳授徒年八十舉鄉飲大賓

熊學沅字滙庭號寄園十六都熊坊人天資聰穎博通經史下筆千言立就性灑落雖困棘闈不以得失介意杜門著述藏有寄園說夢說待梓

熊煥文字有章號樸齋十六都熊坊人文章淹雅弱冠補

博士弟子員十試高等天資聰穎援筆立就尤以四六
著名為人溫厚和平無疾言遽色設教教陽宜豐遊其
門者皆知名士所著有樸齋初稿律賦雅裁

吳步蟾字漢階龍山人邑廩生聰俊不羸弱冠入泮歲科
試輒優等鄉闈屢薦不售督學周擢冠一邑將選拔貢
京師因書法稍遜未果然周終不釋然典試浙廷日以
其所刻步蟾試文另刷散布為多士式後益歛才就法
自哀所作未及竟而卒

况雲字瑞文號晚亭邑增生二十二都高沙人髫年通四
子五經書習舉業捉筆不為常語補諸生四試高等三
薦棘闈乾隆甲辰

南巡召試不錄絕意進取杜門著述以經史自娛究心周秦

漢魏之文旁及諸子百家靡不精貫訓飭子弟獎誘後
進循循不衰壽七十有二所著有詩文諸作待梓

高銘字鑑亭號瘦岑筠南上坊人幼工文兼精詩畫喜吟
咏食餼後援例就訓導屢攝德化與安星子學篆石刻
鴻章所在傳誦梓有荆薇山房詩集年未五十訪友浙
西終於逆旅

彭湏字水雲錦水人幼孤多病喜讀書母胡節婦教之讀
未就塾已熟四子書年十八補博士弟子員試高等食
餼名噪一時然屢薦不售家故貧教讀所入不足給朝
夕兩兄先後下世提攜諸孤與季弟泗共之里黨稱孝

友年四十餘以勤學嘔血卒

塗應麟字國瑞上坊人生而穎異負奇氣咸以遠到期之
未冠補諸生試輒前列屢薦不售益下惟攻苦著詩古
文詞冀成一家之言二十七歲以疾卒其所著述亦散
失無存

褚景緇字希哲南山人幼嗜學年十四默誦十三經不遺
一字父亮功困頓諸生數十年粵遊返喜于穎異日夕
督課入邑庠補增廣生屢試前列學倍奮往廬山從烏
程巖虛白遊歸而所學益進尤邃於易諸家注解得失
獨有會心年三十餘以攻苦卒

陳人瑞字早瞻南門七里山人邑增生潛心力學善屬文
工詩賦年十七丁父憂繼承重戚戚數年服闋補博士
弟子員屢試高等五應鄉試三次備薦壬午場中咯血
苦心孤詣仍薦不售病日深因季父等療治甚急微吟
天生我才必有用之句以慰之竟不起年三十二

幸鳴瑞字和聲增貢生富樓人甫冠遊泮歷試高等弗錄
入闈十七次屢薦不第其文優柔平正和氣樸人眉宇
受業之士多發科甲集經史及宋儒語錄為格言三冊
教本閑家悉務諸此嘗謂能喫虧天下無不可處之事
能耐煩天下無不可為之事著有同懷稿數百首

黃冕字元服楓嶺人喜讀書無間寒暑久著文名而羸弱
多病補諸生攻苦猶昔篤於倫理里黨共稱孝友惜未

竟其學而卒

胡旭字凌漢號晴川郡廩生市南人貫通經史矩矱先民
一時從遊者皆知名士太史徐筠生曠每語人曰吾師
晴川先生經神也著有四書旁解嘉惠後學

易簡字應章上坊人博學工書見推一時性尤誠篤世以
金貞玉粹稱之困諸生中老而不遇恬如也年七十卒
著有竹間詩集

熊椿字壽余湧溪人郡廩生性嗜學經書過目成誦爲文
不落時俗錄於筠陽課藝者畧見一斑嘗著惜字文勸
世年二十八以勤學致疾卒今子舉優行或能承厥志
而大之也

涂學波字連泉郭峯下宅人好古績學試輒高等棘闈十
二戰得而復失以諸生老生平砥礪庶隅不愧儒者成
澄齋碎墨四卷其門下士鶴鳴陳舍人讀而序之

何爾昌字遜能一字蘭亭南山人郡庠生博聞強記學業
甚富雄長文壇訓誨人才多所成就故城令朱瑞堂其
受業者也年逾七十有課藝遺稿待梓

魯建東字周藩淇園人好古嗜學老而彌篤爲文法密理
精古茂淵博補諸生三十餘年棘闈屢躋遂籍明經友
教後進自邑西數十里及宜豐教邑莫不仰若斗山多
所成就著有周易精蘊亨蒙堂文稿年七十八卒

幸鴻謨字達思號漸堂洪城人幼聰穎弱冠入郡庠試即

高等補增入棘闈十八次屢薦未售嘉慶丙辰年幾八旬例得邀 恩賜有勸進者辭曰榮錫者儒是我

聖清曠典第須自量京師往返萬里草霜風燭縱老健究不可恃設於道路蹉跌何以慰我子孫况因年取榮實足滋愧竟不赴居家教育後學以敦倫植品爲先郡建鳳儀書院竭力勸舉有閒窓雜咏及選唐詩二卷制藝集腋四卷壽八十有九臨卒猶手書古訓數則以示後嗣
藝林重之

廖淳名字采芝號芝田上坊人冲融淡靜氣度汪洋力學無間晝夜寒暑爲文追先正矩獲詩賦博雅淹通踰冠補邑庠食餼丙子科額滿見遺功力益篤辛巳病革囑

其子曰吾家長物惟此一經善守之勿替旋卒

鄧以謙字益集冷水坑人潛心經學博涉子史鄉先生以大器期之英年補郡諸生試輒高等累薦不售惟篤志攻苦駸駸乎直造古人之室年近服官賚志以歿士林惜之

朱浩字孟長古唐人籍郡學有聲從父太史珊每以大器期之官農部日嘗携浩帖括就質甬上仇滄柱先生評曰羽翼經傳之作也不必以科名重郵歸示浩卒不自許絕意進取焚香讀易寒暑無間臨終出所定本授子孫曰此聖人寡過書也願世守之

熊文蔚字一斑號見軒觀西人幼聰慧有神童之目十歲

爲文多奇警先輩咸器重之十三歲受知於督學汪瑟庵先生入邑庠評其文曰清新俊逸得之童子大奇倍極獎賞試輒優等癸酉呈薦未售益自勵諸史百家無不研究以攻苦失血卒年二十五有遺稿藏於家

王錫朋字騰萬南城上坊人三歲失怙十齡失恃隨大父讀書力學不倦入郡庠素性豁達不以貧窶易其志經史外兼通素問諸書惜抱才不過而卒

姚百禧字景昌號心田筠北貼市堆人補博士弟子員屢試優等器宇魁梧性厚重事寡母以孝聞博覽羣書旁通康節神數扁鵲醫經年逾四十以瘁卒

何油然字雲彰一字潤之伍橋老居人補諸生力學嗜古

試棘闈得而復失者再勵志不少衰爲文宏博淵深以講明聖學爲己任遠近之士咸宗仰焉著有琳瑯制藝草待梓

熊中遠字儀九號鴻巖城南仁濟坊人郡廩生幼遵庭訓勤學好問經術湛深多士景從邑中之西河也督學按臨及鄉闈同考官咸以得遠卷爲幸年甫強仕而歿爲之心喪者幾半士林其文稿散軼將彙之成篋姪如澗如洵等皆其教育並登甲科道光元年以如洵貴

馳贈文林郎

朱鑑號澄川古唐人爲名諸生攻經學遇疑難多所博辨著有六經考正制藝力追前輩乾隆己酉督學翁覃溪

先生奇其才置第一餽諸郡旋遘瘵疾卒年甫三十五
勿庵侍郎其長子振杲座主也爲立傳

何輝棟字藹敷號曉窓伍橋馬山人邑庠生純粹好學經
史子集博覽淹通爲文不落時趨詩古雅童子試屢冠
軍邑宰黃公嘆賞之有聲大而宏詞曲而當之目宗師
曹補博士弟子員棘闈得而復失者五遂絕意進取杜
門著述有曉窓詩集周禮節畧等遺書

藍步青字迪周號碧溪藍坊人天姿穎異識見超卓郡伯
蔡公世恪拔冠童子軍補博士弟子員益奮於學經傳
子史詩古文詞靡不究心七因棘闈倦於進取以課讀
爲務登臨賦詩怡然自得著有翰溪家塾課藝

傅元求字聘三號任菴山畬人中翰作求之弟生而失恃
叔父養爲己子聰穎絕倫淹通經史年十四補博士弟
子員試輒冠軍旋食餽聲名藉甚豫章老宿無不推服
尤長於古文氣韻風格駁駁乎入唐宋大家之室而齊
其哉詩字並臻佳境人稱全才惜年三十六而卒兄弟
定求敏求彙有任菴文集及詩草藏於家

曾瑟字和鳴四都平湖人邑庠生品行端方學問淹博生
平以理學自期雖顰笑未嘗或苟誘掖後進先道德而
後文藝列其門者皆謹篤行之士年七十二而卒至今
憶其懿範者猶稱道弗衰

朱濬字哲士古唐人質敏嗜學補諸生屢試不售絕意進

取著述自娛經史子集詩古文詞靡不淹通學者宗焉
壽七十七而卒

幸鳴陽字盛周一字儀亭富樓人父志達以文名著不過
早逝鳴陽生而穎異襁褓即能授書成誦十歲爲文骨
清韻秀鄉先輩咸爲推重補博士弟子員襟懷灑落不
專慕科名每開卷務求心得史漢八家手錄成帙自製
批評制藝可存者二百餘首子副貢瓊攜至京師將質
諸薦紳先生而定論焉

熊子舒字廣心號潤齋十九都花苑渡入年十九受知邑
侯黃公拔冠童子軍督學汪大宗師備極嘉賞取入邑
庠旋補增食餼一時名宿咸心折焉棘闈口薦不售

門著述手不釋卷篤學之士也

武啟銘字警予號新齋四十一都南浦人生而穎異讀書
過目成誦弱冠試童子輒有聲郡伯邑侯皆以大器目
之制臺赫觀風拔取冠軍評其文毫無俗艷列膠庠後
鏖戰棘闈屢薦不售而四方來學者日益繁生平嚴氣
正性雖燕居衣冠必正言笑不苟有古人風學者敬而
憚之

幸金垣字厚山富樓人祖父伯叔及兄並業儒不遇早逝
性穎異讀書過目不忘援筆便成傑構受知於王省崖
宗師取入邑庠旋得血症日讀離騷寄其幽恨有擬騷
十數首促節哀音令人不忍卒讀疾亟檢殘稿數百篇

封之書室併題一絕而卒年僅二十有四

羅克偉字菱川號望菴九都高岡人郡廩生性穎慧讀書
默識不忘制藝筆法極古督學注瑟庵尤器重之并謂
詞賦得六朝遺範詩格有盛唐風規作傳贊碑銘每一
稿出士林傳誦年四十六而卒著有樵雲詩草六卷詩
箋蒙求四卷北夢瑣言二卷野人贅譚四卷

玉鳴謙字益甫號受齋九都穩泉塘人郡廩生生平於讀
書外無他嗜好淹通經史屢試超等乾隆庚子癸卯兩
膺呈薦額滿見遺教授生徒先重品誼遊其門者莫不
文行兼修著有四書詳解

